

QADRILI VA  
SUYUKLI  
MUXLISLAR!

2010-yilga

OBUNA DAVOM ETMOQDA!

# TONG YULDUZI

Gazeta 1929-yil 1-avgustdan chiqsa boshlagan

O'zbekiston Respublikasi bolalar va o'smirlar gazetasi

2009-yil  
17-avgust  
N:33  
(66730)

ISSN - 2010-6092



«Siroj» - quyosh  
degani

4 - bet

Yolg'oni  
eplolmadi...

7 - bet

She'riyat  
olamiga  
sayohat

Bu siz uchun  
maxsus yozilgan asar

2-3 - betlar

Ko'rshapalak  
nega ranjidi?

5 - bet



Ko'hna Vatanimiz uzra Mustaqillik bayrog'i hilpiray boshlaganiga o'n sakkiz yil to'imoda. O'sha quvonchli kunnarda tug'ilgan bolalar bugun balog'at yoshiga yetib, katta hayotga qadam qo'yemoqdalar. Ularning oldida O'zbekiston davlatini yuksaltirib, dunyoga mashhur qilishdek yuksak vazifa turibdi.

Istiqlol mamlakatimizga, xalqimizga taraqqiyotning katta yo'lini ochib berdi. O'tgan yillarda mobaynida Qamchiq dovoni, Amudaryo ustidagi ulkan ko'pri, Dehqonobod - Boysun - Qumqo'rg'on, Navoiy - Miskin - Nukus singari ulkan temiryo'llar, yuzlab qo'shma korxonalar, fabrikalar bonyod etilib, ishga tushirildi.

Mustaqillik tufayli Imom Buxoriy, Imom Termizi, Xoja Bahovuddin Naqshbandiy, Motrudiy, Marg'inoniy, Ahmad Farg'oniy singari ulug' allommalarimiz, Jaloliddin Manguberdi, Amir Temur, Temur Malik singari jasur sarkardalarimiz, Abdulla Avloniy, Cho'lpon, Behbudiy, Botu singari shoir va yozuvchilarimizni nafaqat biz, balki dunyo ahli yaqindan tanidi.

Biz yoshlarning har tomonlama bilim olishimiz uchun yaratilgan shart-sharoitlar, imkoniyatlarning esa chegarasi yo'q. Istiqloldan so'ng bonyod etilgan muktablar, litsey va kollejlarga, ularda yaratilgan sharoitlarga bir qarang. Binolarni ko'rib, ko'zingiz quvnaydi. Zamonaviy kompyuterlar, o'quv anjomlari, yangi darsliklar va o'quv qo'llanmalari chinakam g'amxo'rlikning yaqqol namunasidir.

Mustaqillikkacha O'zbekistonimizni xorijda

ko'pchilik tanimasdi. Endilikda mamlakatimiz BMTga a'zo bo'lib, yurtimizda ko'plab chet el davlatlarining elchixonalar faoliyat ko'rsatyapti. Markaziy Osiyoda, MDH va Shanhay hamkorlik tashkilotlariga a'zo davlatlar majlislarida hech bir masala O'zbekiston ishtirokisiz muhokama qilinmaydi.

Mustaqillik xalqimizga asrlar bo'yli orziqib kutgan keng imkoniyatlarni yaratib berdi. Ilgarilar yurtimizning yer osti va yer usti boyliklari olib ketilar, ularning nimaligini va qanchaligini xalqimiz bilmasdi. Ulardan biror-bir naf ham tegmagan. Endilikda yetishtirilayotgan paxta, pilla, qorako'l teri singari davlat ahamiyatiga molik mahsulotlarning foydasi o'zimizda qolib, xalqimiz manfaatlarga xizmat qilmoqda. Oltin, kumush, mis, uran kabi qimmataho boyliklarimiz ham mamlakatimiz taraqqiyoti, insonlarning farovon turmushi uchun sarflamoqda.

Har ikki yilda ko'hna Samarqand shahrida o'tkazilayotgan «Sharq taronalari» xalqaro musiqa festivali Vatanimizni va uning milliy san'atini dunyoga tanitishda katta ahamiyat kasb etmoqda. Bu festival sabab jahoning eng taniqli san'atkorlari yurtimizga tashrif buyurib, mahoratlarini namoyish qilish bilan birga, xalqimizning qadimiy san'atini, qadriyatlarini ham o'rganib, ularni o'z yurtlarda targ'ib qilmoqdalar.

Istiqlol tufayli milliy kurashimiz dunyoga tanilib, yil sayin tobora ommalashib bormoqda. Hozirgi kunda sportning bu turi bo'yicha Jahon kurash federatsiyasi tuzilgan. Har yil dunyoning turli mamlakatlarda kurash bo'yicha jahon birinchiligi o'tkazilmoqda.

Istiqlol  
tufayli  
O'zbekistonimiz  
poytaxti Toshkentning  
qiyofasi tubdan o'zgardi. O'zining 2200  
yilligini dunyo miyqosida nishonlayotgan azim  
shahrimiz ko'chalari va uning atrofidagi binolar,  
mehmonxonalar, ko'priklar, bozorlar yanada obod  
bo'lmoqda. Bunyodkorlarimiz poytaxtda yana bir go'zal  
koshona - «O'zbekiston» xalqaro anjumanlar saroyini  
barpo etdilar. Xorijdan kelayotgan mehmonlar qisqa  
davr ichida «Sharqning darvozasi» bo'lgan  
Toshkentning tubdan o'zgarib ketganligini  
ta'kidlamoqdalar. Ayniqsa, «Talabalar shaharchasi» va  
uning qo'ynidagi oliy o'quv yurtlari, yotoqxonalar  
poytaxt ko'rkiga ko'rk bag'ishlab turibdi.

Mustaqillik bo'Imaganda, biz yoshlarga, xalqimizga  
shunchalik imkoniyatlar, baxt-iqbol nasib etarmidi?!  
Aslo. Mustamlakachilik iskanjasida ezilib, hatto o'z  
tilimizning qadrini ham bilmasdan o'taverardik.  
Endilikda har yili 21-oktabr - ona tilimizga Davlat tili  
maqomi berilgan kun sifatida keng nishonlanmoqda.  
Bu kunlarga yetganlar bor, yetmaganlar bor. Endigi  
zamon biz yoshlarniki. Buning uchun esa biz yanada  
yaxshiroq o'qishimiz, ilm cho'qqilarini egallab, farovon  
jamiat barpo etib, dunyoga tanishtirishimiz kerak.

Sevimli shoirimiz Abdulla Oripov yozganidek:  
*O'zbekiston - ona yurtim, ota makonim,  
Shu bepoyon jahon ichra tengsiz jahonim.  
Yangi davron koshonasi o'zing bo'lgaysan,  
Inshoollo, endi obod nurga to'lgaysan.*

Mustaqilligimiz abadiy bo'lsin!

**Nargiza RAZZOQOVA,**  
yosh muxbirimiz

TOSHKENT — 2200

## NO'G'OV QO'RG'ON

Bolalar, biz sizlarni poytaxtimizning har bir  
go'shasining tarixi bilan navbatma-navbat tanishtirib  
borayapmiz. Bu gal Toshkent shahar, Sergeli  
tumanidagi No'g'ov Qo'rg'oni tarixi haqida hikoya  
qilamiz:

XIX asrning 20-yillarida Chor hukumatining  
harbiy xizmatidan qochgan tatar yigitlari Toshkent  
xoni Azizbekdan uning tilmochi Karamishev orqali  
panoh izlab, yer so'raydilar. Xon ularga Salor  
arig'inining chap tomonidagi Qo'g'ayit tepe hududini  
in'om qiladi. Xonning bu iltifotidan xursand bo'lgan  
yigitlar Mulla Vali degan kishi boshchiligida No'g'ov  
Qo'rg'on mahallasini barpo etganlar. Mahalla ahli  
kartoshka, pomidor kabi sabzavotlar yetishtirib,  
Toshkent bozorlarida savdo qilishgan.

**SO'RAGAN EDINGIZ**  
«Lizing» nima? Bu so'zni  
ko'p eshitaman. Shu to'g'rida  
ma'lumot bersangiz.  
F.HAKIMOVA,  
Toshkent shahri


Ma'lumki, bozor iqtisodiyoti davrida  
lug'atimizga ko'plab xorijiy so'zlar kirib  
kelmoqda. Ularning mazmunini, albatta,  
bilishimiz zarur.

«Lizing» so'zi ingliz tilidan olingan  
bo'lib, «ijara», «ijaraga olmoq»  
ma'nosini bildiradi. Lekin bu biror narsani  
ijaraga olish degani emas. Masalan, siz,  
aziz o'quvchim, lizing shartnomasi  
asosida traktor sotib oldingiz va undan  
foydalanim daromad ola boshladингiz.  
Endi siz bosqichma-bosqich qarzni uzbiz  
borishingiz kerak. Lizing degani ana shu!

## SHE'RIYAT OLAMIGA SAYOHAT

### Tahririyatdan:

*She'riyat olami qutlug' olam. She'riyat olami ruhiyat olamidir. Bu olamni yuzlab, minglab, o'n minglab ijodkorlar yaratadilar. Bu olamni yaratuvchilarni shoirlar deb ataydilar. Ularning yana bir nomi tuyg'uchilardir. Shu nomning o'ziyoq she'r-qalb mahsuli, his-tuyg'u hosilasi ekanini anglatadi. Sevimli shoirimiz Erkin Vohidov lutf qilganlaridek, she'r asli dil savoliga dilning javobi hamdir.*



*Ha, she'rlardan bonyod bo'lajak she'riyat olami sirlar, mo'jizalar dunyosidir. Boshqa fanlardan farqli o'laroq, she'rni-adabiyotni o'qib yig'lashing, kulishing, o'yga tolishing mumkin. Adabiyotni, jumladan, she'rni bejiz dunyoning sakkizinchmo'jizasi demaydilar. Iste'dodli bolalar shoiri Abdurahmon Akbarsiz, aziz o'quvchilarini bolalar she'riyati olamiga sayohatga chorlaydi.*

Aziz bolajon! Mana, yangi o'quv yili  
boshsanishiga ham ozgina vaqt qoldi.  
Zerikmayapsanmi? Maktabingni,  
sinfoshlarining sog'inayotgandirsan?  
Albatta sog'inaysan, men bu ni dil-dilimdan his etib turibman. Chunki bir  
paytlar sendek bola bo'lganman,  
maktabda saboq olganman. Bahorda  
tezroq ta'tilga chiqishni, yoz oylarida  
sentabrning tezroq kelishini intiq  
kutganman. Ta'tilda miriqib o'ynab,  
ota-onamga uy yumushlarini bajarishda  
yordam berganman. Kutubxonadan  
kitoblar olib kelib, mazza qilib  
o'qiganman. Ayniqsa, «Tong yulduzi»,  
«G'uncha» va «Gulxan»ni qo'limdan  
qo'yaganman. Tush paytlarida  
anhorada cho'milib, tiniqib uylashga  
ham, oynayi jahon ko'rishga ham vaqt  
topganman.

Mana, bugun sen ham  
ta'tildasan, har haftada uyingga o'z



# O'sha paytdagi cheksiz orzularim ichida sen ham bor eding, she'riyat!

Har tong derazamni keng ochib yuboraman. Momodan eshitganim rizq, davlat, quyonch uyimga kirsin, deb shunday qilaman. Va yana umrimming eng beg'ubor fasli – bolaligimni sog'inaman... Tonggi shamollar uni menga qaytarishini orzu qilaman.

Men do'st-u dugonalarimdan topmaganlarimni ulardan topganman. Cheksiz hikmat va tafakkur dunyosida hayot kechirganman. Bolaligim armonlari nimalarda qolgan?

Insonlar ulg'aygach, o'ziga xos xislatga ega bo'ladi, hammaning hayoti alohida kitob bo'ladi, lekin bolalik

## OLTIN FASL HAYRATLARI



Insonning tabiat qiziq: yoshi o'tgan sari bola bo'lib boraveradi.

Yodimda... mahallamiz qizlari bilan yig'ilishib, sochlarnizga jamalaklar taqardik. Asli qora bo'lgan qoshlarimizni yana qoraytirib, o'smalar qo'yardik. O'smani eza-eza she'rlar aytardik. Keyin yaltiroq toshchalarni saralab, ko'chmak o'yin o'ynardik. Bir gapirib, o'n kulib, ba'zan asta-sekin qizarayotgan ufqni jim kuzatardik. Eng muhimi, tezroq katta bo'lishni, so'ng uzoq uzoqlarga borib o'qishni orzu qillardik.

Bolaligimdag'i o'sha tuproq ko'chalarni qattiq qo'msayman. Orzulari olamcha bo'lgan, qaqildoq dugonalarimni ham sog'inaman. Qishlog'imizdag'i yakku-yu yagona kutubxonaning ochilishini kun bo'yi orziqib kutardim. Hatto kutubxonachi meni bekorchilikda ayblab, ba'zan haydab ham solgan. Ne qilay, kitoblarga, undagi javlon urgan go'zallikka yuragim oshufta edi. Dengizchi Rual Amundsen, yozuvchi Martin Iden, shoh va shoir Bobur, nafis qalbli insonlar – Kumush va Otobek haqidagi kitoblar mening dildoshlarim edi.

Men atrofimdag'i odamlar, ottonam, yaqinlarim bilan kam muloqotda bo'lganman. Ko'proq ijodiy xayilot denizida suzganman.

«Men o'z orzularimning soldati emas, generali bo'lishni istayman». Bu so'zlar kundalik daftarimdag'i shiorim edi.

Axir bolalik kezlarimdag'i ranglar qanchalar tiniq edi, u paytlardagi pokizalik, beg'uborlik butun mavjiyu to'lqinlari bilan yuragimda qattiq o'rashib qolgan. Shu sabab, hozir ham kechki salqindagi osmon uzra yulduzlarga boqib, saatlab termilib, u ranglarni izlayman. O'sha paytdagi cheksiz orzularim ichida sen ham bor eding, she'riyat! Bu ulkan orzularim ichra sen ham borsan, adabiyot!

chog'larida barcha bir-biriga o'xshab ketadi. Sho'r Alisher Navoiy, yozuvchi Chingiz Aytmatovning bolaligi bilan hozirgi zamon bolalarining zavq-u shavqida ham uyg'unlik bor. Ular ham quyosha, tog'larga, osmonga hayrat bilan boqishgan, gulzorda chirolyi kapalaklarni quvishgan, tonggi shabnamni hovuchlab, shirin-shirin orzular qilishgandir, balki. Axir bolalikdag'i go'zal orzular bo'limasa, yaxshilik haqidagi tasavvurlar odamlar qalbida qanday unib-o'sadi? Zero, bolalik kelgusi daholikdan darakdir. Dunyoning ertasi, hayotning mazmuni sanalgan BOLALIK dunyosining ustunlari pishiq, mustahkam bo'lsin.

Qalbimizdag'i go'zallikka yo'g'rilgan hayratlar bizni hayotga chorlaydi. Axir bizni bolalikdag'i orzular bir umr tark etmaydi! Chingiz Aytmatovning «Oq kema»ni kutgan bolakaydek o'z oq kemamizga doimo mushtoq bo'lamiz. Uning yelkanlari oqarib, bir kun ko'ngil uyimizga kirib kelishini orziqib kutamiz. Balki shu bois har tong derazalarni keng ochib, uzoq-uzoqlarga tikilarman. Bir kun uning xabarini qaldirg'ochlar olib kelar...

Gulandom TOG'AYEVA

## YOZNING ISSIQ KUNLARIDA

Olimjon ta'til vaqtida ham jonajon mactabidan ayrılmadi. Negaki, u bilim olayotgan Sobir Rahimov tumanidagi 234-mactabda yozgi dam olish oromgohi ochilgan edi. Ular mactab direktori Saidahmad Obidov boshchiligidagi «Xasti imom» majmuasiga, Toshkentning 12 tarixiy darvozalari joylashgan mayzelarga borib, shahrimizning qadimiy obidalari bilan yaqindan tanishibdilar. Bundan tashqari, oromgoh dam oluvchilari o'zları qiziqqan sport mashg'ulotlariga, musiqa va rassomchilik



to'garaklariga ham qatnashishibdi. Toshkentning 2200 yilligiga bag'ishlab o'tkazilgan «Toshkentim – onam» tadbirida barcha o'quvchilar faol ishtirot etib, ustozlari maqtoviga sazovor bo'libdilar.

Yozning issiq kunlarini pisand qilmagan dam oluvchilar «Chimboy» suv havzasida cho'milib chiniqibdilar. Bu tadbirlarning barchasi Olimjonga juda manzur bo'libdi. U kelasi yili ham ana shunday dam olishni rejalashtirib qo'yibdi.

Umida MAHKAMOVA,  
yosh muxbirimiz

oyog'i bilan kirib boruvchi «Tong yulduzi» gazetasini, shuningdek, ko'plab badiiy kitoblar o'qishingni istayman. She'rlar yod olishingni xohlayman. Kim biladi, bir kun kelib, balki she'rlar yozarsan, qator-qator kitoblarining chop etilar.

Senga bir sirni ochay, ko'nglingda shoir yoki yozuvchi bo'laman, degan orzung bo'lsa, albatta o'z maqsadingga yetasan. Chunki ko'p narsa, avvalo, niyatga bog'liq. To'g'ri, hech qayerda shoir va yozuvchilikni o'rgatadigan mactab yoki oliy o'quv dargohi yo'q. Lekin qunt qilsang, jilla qursa, mening ushbu adabiy qaydlarim, mulohazalarim bilan tanishsang, she'riyat olamiga sayohatga chiqsang, adabiyot haqida, she'r haqida, shoir va yozuvchilarning ichki dunyosi haqida anchagina ma'lumotlarni bilib olasan. Bilganlaring esa ijod

mactabi vazifasini o'taydi, badiiy asarlar yozishingga turki bo'ladi. Bu yo'lda omad tilayman. She'riyat olamiga tashrifing muborak bo'lsin, aziz bolajon!

### TANISHUV YOKI SAYOHAT TADORIGI

Darvoqe, o'zimni tanishirishni unutay debman. Meni qo'ni-qo'shni bolalar Abdurahmon aka deyishadi. Yangiyo'l akademik litseyining qalamkah talabalariga «ustoz»man. Ishxonam – sen uchun ko'plab badiiy kitob va darsliklar chop etib kelayotgan Cho'lpon nomidagi nashriyot matbaa ijodiy uyida hamkaslarim «shoir», deyishsa,

Yulduz, Sevinch, Zebo degan

qizlarning dadasi, nabiram – Ozodbekning buvasiman. Qisqasi, 37 yildan buyon jonajon o'g'il-qizlarga she'rlar yozib, bolalarbop she'rlarni o'zbek tiliga tarjima qilib kelayotgan Abdurahmon Akbar bo'laman. Yozganlarim matbuotda juda ko'p marta chop etilgan. Ba'zi she'rlarim «Atrofimizdag'i olam», «O'qish kitobi», «Ona tili» kabi boshlang'ich sinf darsliklaridan joy olgan. O'ndan ortiq kitoblarim nashr etilgan.

Sen mendan shoirlikka o'qitadigan mactab bo'limasa, qanday qilib she'r yozishni o'rgangansiz, bunga nima turki yoki sabab bo'lgan, deb so'rashing mumkin. Shu va shunga o'xhash savollaringga bajon-u dil

javob beraman. O'yaymanki, javoblarim adabiyotga, she'riyatga bo'lgan qiziqishning oshiradi, qo'lingga qalam tutqazadi. Agarda she'r yozishni mashq qilib yurgan bo'lsang, bu boradagi qarashlaring va fikrlaringni boyitadi. Xo'p desang, sen va sening do'stlaring bilan she'riyat deb atalgan sirlari va go'zal olamga sayohatga chiqamiz. Shoirlarning adabiyot deb atalmish muqaddas bo'stonda amalga oshirgan ishlari – she'rlarini ko'zdan kechiramiz, zavqlanamiz. O'qib, o'rganamiz.

Sayohatga chiqishga tayyormisan? Unday bo'lsa, olg'a!

Abdurahmon AKBAR  
(Davomi bor)

## BAXT HAVODAN ESMAYDI

AZIZ O'QUV-

CHI! Sen bu dun-yoga boy bo'lish uchun emas, baxtli bo'lish uchun kelgansan. Sening baxting yolg'iz o'zingga bog'liqmi? Donolar bu savolga:

«Kishining baxti boshqalarga keltirgan baxtiga qarab o'chanadi», deyishadi. Kimki do'stiga yaxshilik o'rniga yomonlik tilasa, u o'ziga baxt emas, fojia sotib oladi.

Hazrat Alisher Navoiy bobomiz bu o'rinda xo'b o'xhatib yozganlar:

*Har kishikim birovga qozgay choh,  
Tushkay ul choh uzra o'zi nogoh.*

\* \* \*

*Hayotda faqat birgina chinakam baxt bor: u ham bo'lsa, boshqalar uchun yashamoqdir.*

Lev Tolstoy

\* \* \*

*Kimki o'zgalar baxtidan baxt topsa, u haqiqiy yashagan hisoblanadi.*

I.Gyote

\* \* \*

*Baxt havodan esmaydi, mehnatdan keladi.*

Rudakiy

\* \* \*


*Boshingda quyosh charaqlab turganida, izingdan qolmaydigan do'st – shunchaki do'st.*

*Boshingda quyosh charaqlab turganida izingdan qolmaydigan, boshingga bulut kelganida g'oyib bo'ladigan do'st – do'st emas.*

*Boshingda quyosh charaqlab turganida izingdan qolmaydigan, boshingga bulut kelganida xiyonat qiladigan «do'st» – dashman.*

*Boshingda quyosh charaqlab turganida izingdan qumaydigan, boshingga bulut kelganida izingdan qolmaydigan do'st – haqiqiy do'st.*

O'Hoshimov



Boshida surxon do'ppisi, qo'lida do'mbira tutgan jajjigina bolakay qo'shiq kuylayapti:

*Dur ichida durdona,  
Olam ichra yagona.  
Go'zallikda afsona,  
Chamanim – O'zbekiston!*

deyishadi.

– Isming ma'nosini bilasanmi? – so'rashadi bolakaydan.

– «Siroj» – quyosh degani. Men ham qo'shiqlarim orqali kishilar qalbiga iliqlik olib kirmoqchiman. Katta bo'lsam, «Fayz» dastasini tuzaman...

Ushbu dastani purviqor tog'larga

Uning qo'shiq ohangiga monand raqsini, qo'ichalar, yelkalarining ildam harakatlarini kuzatsangiz, hayratingiz oshadi. Sirojiddin ismli bu bolakayni tanigan, bilganlar esa sira ajablanish maydi: «Fayzullayevlar» folklor oilaviy dastasining tamal toshini qo'yan Abdurahim bobo bilan Nazira momolarning nabirasi qo'shiq kuylamasda ham bo'lmaydi-da axir,

tutash Surxon vohasi bag'ridan sizib chiqayotgan zilol buloqqa qiyoslashardi. Buloq suvi insonlarning tashnaligini qondirgani kabi dasta ijrosidagi xalq qo'shiqlari, lapar va termalar tinglovchingin ma'naviy olamini boyitadi.

Dastaning 1998-yili Jizzax shahrida o'tkazilgan respublika miqyosidagi oilaviy dastalar ko'rik-tanlovida qatnashib, 3-o'rinni qo'liga kiritishida 6 yoshli Sirojiddinning ham o'ziga yarasha hissasi bo'lgandi.

«Kim bo'lsam ekan?» Mustaqil hayotga qadam qo'yayotgan har bir o'smiring oldida ko'ndalang turadigan bu savol Sirojiddin o'ya toldirmadi. Aniqrog'i, u kasbni emas, kasb uni tanladi. Navqiron qalbida bir olam orzu-havaslar bilan poytaxtga, Abdulla Qodiri nomidagi Toshkent Davlat madaniyat oliygohiba oshiqli. Birinchi ustozi – otasi Erkin Fayziyevdan, amakilaridan o'rganganlarini oliygohdagi ustozi O'zbekiston va Qoraqalpog'iston xalq artisti Xayrulla Lutfullayevdan olgan saboqlari bilan boyitdi. O'zbekiston xalq artisti Mahmud

Namozovni o'ziga ustoz bildi.

Bolalikda qilingan sof, beg'ubor tilaklar albatta ijobat bo'ladi, deyishadi. Sirojiddin Fayziyevga ham samimiy niyatları hamroh bo'lib, «Fayz»-dastasini tuzdi.

2008-yil umidli xonandaning hayotida unutilmas iz qoldirdi. Yurtboshimiz tashabbusi bilan yosh, iste'dodli san'atkorlarni qo'llab-quvvatlash maqsadida ta'sis etilgan «Nihol» mukofoti sovrindori bo'lidi. Bu mukofot uning zimmasiga yanada kattaroq mas'uliyat yuklashini his qilgan holda, yangi-yangi qo'shiqlar yaratish ustida izlandi. «Yagonasan, muqaddas Vatan!» qo'shiqlar tanlovida qatnashib, mahoratini yana bir bor sinovdan o'tkazdi.

Asrlar osha sayqallanib kelayotgan milliy qadriyatlarimiz, go'zal an'ana va urf-odatlarimizni kelajak avlodlarga ham yetkazish ishtiyoyqida yonib, xalq mehriqa qonib ijod qilayotgan umidli xonandamizga oq yo'l tilaymiz!

Feruza JALILOVA

## 2009-YIL – QISHLOQ TARAOQIYOTI VA FAROVONLIGI YILI



### GO'ZALLIGING O'ZGACHADIR

Ta'il kunlarida ham «Tong yulduzi» gazetasini muntazam o'qib boryapman. Ayniqsa, «Qishlog'im – qalb ardog'im» tanloviga yozilayotgan maktublar meni befarq qoldirmayapti. Meni nging Tomadurgadik qishlog'im ham go'zallikda boshqalardan qolishmaydi. Kindik qonim to'kilgan muqaddas go'shamga boqib, ko'nglimdan doimo bir o'y kechadi:

*Go'zalliging o'zgachadir,  
Ey, ona tuproq!*

Ana shunday go'zalligi o'zgacha bo'lgan ona tuproq'imning odamlari birlari bilan ahil, do'st. Ular kattaga hurmatda, kichikka izzatda bo'lishadi. Biz ulardan faqat yaxshi xulqni, odob-axloqni, xushmuomalalikni o'rganamiz. Gazetadagi ayrim maqolalarni kattalar bilan birgalikda muhokama qilamiz.

Men ana shunday hamqishloqlarim borligidan faxlanaman.



Mahliyo ALLABERGANOVA,  
Xorazm viloyati, Xonga tumanidagi  
33-maktab o'quvchisi

### NEGA «GULDURSUN»?

Ellikqal'ada nomidan ham ko'rilib turganidek, 50 ta qal'a joylashgan. Ularning bari o'z tarixiga ega. Qal'alardan biri – «Guldursun» haqida momomdan eshitgan rivoyatimni hikoya qilmoqchiman:

Qadimda bosqinchilar bir qal'aga hujum qilib, uni qamal qilishibdi. Tashqaridan kelayotgan oziqvat yo'lini to'sib qo'ysak, qal'a ahli och qolib, bizga taslim bo'ladi, deb o'yabdi dushman. Qal'aning Gul ismli juda aqlli, dono malikasi bo'lgan ekan. U odamlarga:

– O'zingiz yemasangiz ham, mollarni bug'doy bilan boqinglar, shunda o'zingizga yaxshi bo'ladi, – debdi.



Qal'a ahlining mollarini bug'doy bilan boqayotganini ko'rga n dusmanayg'oqchilar bosliqlariga:

«Bular hali-veri och qoladiganga o'xshashmaydi, hatto



Bulung'ur tumanida istiqomat qilaman, Jomboy tumanining chekka qishloqlaridan bira bo'lmish Qoramo'yin qishlog'ida tavallud topganman.

Tug'ilganimda dimog'imga ilk bor ushbu qishloq havosining tafti urilgan. Ilk qadamim, eng avvalo, ushbu tuproqqa tekkan. Bu jannatmakon, har tongi qayta takrorlanmaydigan qishlog'imni hech bir joyga almashtayman, chunki qishlog'im mening orim va qalb ardog'imdir.

Necha yuz yillar ilgari qishlog'imizda hech kim yashamagan. Birinchi bor Surxondaryo viloyatining Boysun – Qo'ng'irot hududiga qarashli Qoramo'yin qishlog'ining aholisi ko'chib kelgan va shu yerda o'troq hayot kechirib qolgan. Shu sababli, bu qishloq Qoramo'yin qishlog'i deb atalgan.

XIV-XV asrga oid shahar xarobalari Qoramo'yinda ham mavjud. Bu yerda ulkan-ulkan dashtlar juda ko'p. Ularning eng kattasi To'rtkul tepe deb ataladi. Tepaliklar ko'p bo'lgani sababli, bu yer Mingtepa deb nom olgan. Insonlar dasht oraliqlaridan o'zlariga boshpvana qilishgan. Qishloq o'rtasida katta



tepaliq Qorovultepa bor. Shu yerga chiqib, qishloq askarlari uni muhofaza qilishgan.

Amir Temurning askarlari ushbu qishloq markazidan o'tib ketganlar. Bu qishloqning maftunkorligi, daraxtlarining ko'pligi sababli qishlog'imizda bir kun dam olib ketishgan ekan. Chekka hududidan esa «Buyuk ipak yo'li» kesib o'tgan. Shundan ham bilishimiz mumkinki, qishlog'imning hali ochilmagan qirralari juda ko'p.

Men ona Vatanimdan, go'zal qishlog'imidan faxlanaman.

Gulshan ABDUHAMIDOVA,  
Samarqand viloyati, Bulung'ur  
tumanidagi 22-maktab o'quvchisi

mollarini ham bug'doy bilan boqishyapti. Ularning och qolishini poylab, o'zimiz ochlikdan qirilib ketamiz chog'i...», deya xabar yetkazishibdi.

Dushman noiloj ortga chekinibdi. Qamaldan ozod bo'lgan qal'a ahli shod bo'lib, qal'ani malikaning nomi bilan

«Guldursun» deb atay boshlabdi. Bundan tashqari, «Tuproqqal'a», «Yonboshqal'a», «Ayozqal'a», «Qirqqizqal'a» kabi qal'alar haqida ham xalq orasida ko'plab afsona-yu rivoyatlar yuradi.



Fazilat RAHMATULLAYEVA,  
Qoraqalpog'iston Respublikasi,  
To'rtko'l tumanidagi  
45-umumta'lim maktabining  
8-«B» sinif o'quvchisi

5

2009

Tong yulduzi  
17-avgust

# QUVNOQ TA'TIL



Vaqting o'tishini qarang, aziz bolajonlar! Kechagina yo'zgi ta'til kunlaringiz boshlanishi munosabati bilan sahifamiz nomini «Quvnoq ta'til» deya o'zgartirgandik. Bugun esa yana «Quvnoq tanaffus» sahifasini tayyorlashga hozirlilik ko'ryapmiz. Chunki sanogli kurnlardan so'ng yangi o'quv yilini boshlab yuborasiz. Lekin ta'tilning bir kuni ham ta'til-da! Maroqli hikoyalar, quvnoq hangomalar o'qib, boshqotirmalar yechib, miriqib dam olishga ne yetsin, nima dedingiz?!

Burgut biroz o'ylanib turib, hamma qushlarni yoniga chaqiribdi va patlаридан Ko'rshapalakka berishlarini so'rabdi. Har bir qush o'z patidan bergach, u ajoyib qiyofaga kiribdi. Chunki har qaysi pat har xil rangda ekan-da. Ko'rshapalak bu patlар bilan maftunkor bo'lib ko'rindibdi. Boshqa qushlardan go'zalligini ustun qo'ya boshlabdi. O'ziga oro bera-bera, hech kimga rahmat ham aytmay, pirillab uchib ketibdi. Ko'rshapalakning bunday yo'l tutishi qushlarga sira yoqmabdi. Voqeadan xabar topgan Burgut Ko'rshapalakka:

— Nima uchun qushlarga rahmat ham



## KO'RSHAPALAK NEGA RANJIDI?

Ta'til kunlarim behuda o'tmayapti, mustaqil ravishda til o'rgandim. Ingliz tilida tarjima qildim. Ana shunday tarjimalarimdan birini tengdoshlarim hukmiga havola qilyapman:



Kuzning sovuq kunlаридан birida uchib borayotgan Ko'rshapalak yiqilib tushib, yig'lay boshlabdi. Qushlar shohi Burgut uning ovozini eshitib qolibdi:

— Nega yig'layapsan, qorning ochmi? — deb so'rabdi undan.

— Yo'q, men sovqotganidan yig'layapman, — javob beribdi bechora Ko'rshapalak.

— Qushlar sovuq qotishmaydi-ku!..

— Mening patlарим yo'q, boshqa qushlarning pati borligi uchun ham sovuq qotishmaydi-da, — debdi Ko'rshapalak nolib.

aytmading? Sendan xafa bo'lishyapti. Axir ularning patlari bilan chiroli bo'lding, endi sovuq ham qotmaysan, — debdi.

— Qushlar hasad qilishyapti, chunki men ulardan chiroliroqman-da, — debdi jilvakor qanotlarini yoyib.

Burgut ham undan astoydil xafa bo'libdi:

— Qushlar to'g'ri aytishibdi. Endi senga nasihat ham befoyda ekan. Qani, bergen patlaringizni qaytarib olinglar-chi, — debdi jahli qilib.

Har bir qush bergen patini qaytarib olibdi. Shu-shu Ko'rshapalakning pati yo'q ekan. Qushlардан arazlab, ular bilan uchrashib qolmaslik uchun faqat kechasi uchishga ahd qilibdi.

Ingliz tilidan  
Madina MIRZAQOBILOVA tarjimasi



yalindi ukam.

— Darrov kir, qolganimi ertaga o'ynaysizlar...

Hozirgina uyga kirmayman, deya xarxasha qilayotgan

## «OYOMOMANI OLIB KIRDIM»

daqqa o'tar-o'tmas

hovliga mammun qiyofada kirib keldi va ko'zlarini osmondan uzmay:

— Oyijon, men oymomani uyimizga olib kirdim. Endi ko'chalar qorong'u bo'lib qoladi, o'rtoqlarim ham uylariga kirib ketishadi...

AZIZA

To'rt yashar ukam Ulug'bek mahalladagi bolalar bilan ko'chada o'ynayotgandi.

— Bolajonim, uyga kir, vaqt ham allamahal bo'lib qoldi, — deya uni chaqirdilar oyijonim.

— Oyi, yana biroz o'ynay, o'yinimiz juda qiziyotgandi, —

Ushbu gaplarni diqqat bilan o'qisangiz, dunyo mamlakatlari va poytaxtlari nomini topasiz:

1. Frans «iya» degancha hayratlanib, qizga qaradi. Pari juda g'amgin ovozda gapira boshladi.

2. Kipringing nam qilma endi, ko'nik, ojiz asira, dedi ruhoniy.

3. Tushimda Chorsudan kattakon fil xartumini o'ynatib o'tayotgan mish.

4. Haqchil, ishchan yigit Santyago bilan murosila qilolmadi.

5. Saroydan yiroqdagi chorbog' — Dodho ko'ngliga manzur joy edi.

6. Go'zal turkiy ash'ori bilan dillarni maftun aylagan Hazrat Navoiy siymosi kelajak avlodlarga umid bilan samodan boqib turgandek tuyuladi.

Dilafro'z USMONOVA,  
O'zMU qoshidagi Sobir Rahimov  
akademik litseyi o'quvchisi

## QIZIQARLI MASALAR

Birinchi marotaba o'nli kasrni kim ishlatgan?

Odamning yuragi 1 daqiqada o'rtacha 75 marta ursa, 75 yil davomida necha marta uradi?



Har xil tomonli uchburchakni ikkita teng uchburchakka ajratish mumkinmi?

0,1,2,3,4,5,6,7,8,9. o'nta raqamning yig'indi kattami yoki ko'paytmasi?



## POKIZA TUYG'ULAR

Vatan! Unga har kim har xil ta'rif beradi. Yurtimizning chekka qishloqlaridan kelayotgan she'lar bunga guvoh. Bu tuproqning har bir xasi biz uchun tongsiz bir olamadir. Bas, shunday ekan, bortiqning har zarrasini ko'zdan qochirmay ijod qilgan kishigina shoirdir. Yosh ijodkorlarimizning bizga yo'llagan maktublarida yurtga bo'gan mehr-muhabbatining beg'ubortigiga amin bo'ldik. Ustarning pokiza tuyg'ulari bilan sizni ham zushnud elgimiz keldi.



## ORZUM

Bugun menin orzularim mo'l, O'yinقارоқ davrim, xush endi. O'smirlikka olayapman yo'l, Bolaligim ajib tush endi.

Maqsad sari talpinar yurak, Dilga ulkan istak to'ladi. Hali ko'p-ko'p o'qishim kerak, Kelajakda kerak bo'ladi.

Istiqlolni kuylayman shodon, Ulg'ayaman, kuchga to'laman. To'marisga munosib avlod, Zulfiyaga izdosh bo'laman.

**Matluba MAMASODIQOVA,**  
**Navoiy shahridagi**  
**12-maktabning 7-sinf o'quvchisi**

### (Boshi o'tgan sonda)

Voy b-o'-o'-o'... Shuncha kitob... Javonlarga sig'maydi, yonlamachasiga terib tashlangan. Juda ko'p. Ko'pdan ham ko'p... Shuncha kitobni butun qishloq yotvolib o'qisa ham, tugata olmas edi. Men kitoblar orasidan eng semizini qidira boshladim. Vaqt kelib, tatar xotinning o'rniqa kutubxonachi bo'lib qolishim, institutga kirib ketishimga shu kutubxona sababchi bo'lishini xayolimga ham keltira olmas edim. Oxiri qidirgan semiz kitobimni topdim. Moshrang muqovali, o'ziyam rosa og'ir. Ustiga tilla harfda «Kapitan» deb yozib qo'yildi. Urush haqida bo'lsa kerak, deb o'yladim.

— Irgashgami?— so'radi tatar opa qo'limdan kitobni olib.

— O'zimga oldim...

— Ay, bolaqoyim,— dedi u kitob bilan boshimga tushirib,— bu kitabni sen tugul Jannat opangda uqiyolmiy. O'qisa, Irgashgina uqiy ola, deb Ergash akaga yana hurmat bildirib qo'ydi u.

— Men o'qiy olaman, ana, «Kapitan» deb yozib qo'yibdi-ku,— dedim kitobdan ajrab qolishdan qo'rqiб.

— Nindi Kapitan, «Kapital»,— ustidan kaldi kutubxonachi,— bundiy kitablarni talabalar, professorlar uqiy...

Keyin bilsam, o'sha kitobim rosa boshog'riq ekan. Institutda uni to'rt yil o'qib ham hech narsaga tushunmaganman...

Ichkariga qaytib kirib, haliday semiz kitobni yana qidira boshladim. Bitta kitobning muqovasidagi surati menga judayam yoqib qoldi. Yigit bilan qiz tepalikdagi daraxt tagida uzoq-uzoqlarga qarab turishardi. Pastlikda

## MEHRI QUYOSHIM

Sendayin o'zga hech bir mehribon yo'q, Seningdek aziz-u, do'st-u yoron yo'q, Onajonim, sen kabi toza vijdon yo'q, Boshga toj aylayin, mehri quyoshim!

Poyingga gul to'shab, aylay poyondoz, Senga bor umrimni bersam hamki oz, Vatanday ulug'san, etayin e'zoz, Boshga toj aylayin, mehri quyoshim!

Onasiz hayot yo'q, yo'q yorug' jahon, Onadir tabarruk, muqaddas inson, Qalbi pok-u, daryo, mehrider ummon, Boshga toj aylayin, mehri quyoshim!

**Madinabonu XOLMIRZAYEVA,**  
**Farg'onan viloyati, Oxunboyev tumanidagi**  
**28-maktabning 7-sinf o'quvchisi**

## KO'KLAMGA O'XSHAYSAN

Vatanim, sen bugun o'n sakkiz yoshda, Majnunni rom etgan misoli Layli. Ko'klamga o'xshaysan, gulchambar boshda, Ko'ngil ulg'ayadi mehring tufayli.

Shodliklar yarashar, sho'xlik yarashar, Yarashar ko'kdagi zafar quyoshing. Keng jahon havas-la senga qarashar, Ayni o'n sakkizga to'lganda yoshing.

Mag'rursan tog'lardek, go'zal, betakror, Bag'ringda loladek unib yashash baxt. Sen menin yagonam, borlig'im tanho, Tuprog'ing men uchun erur toj-u taxt.

Muborak o'n sakkiz umr bahoring, Senga ko'z tegmasin gulgun bo'stonim. Farzandlaring saqlar g'ururing, oring, O, mustaqil yurtim, O'zbekistonim!

*Maryam G'ANIYEVA,  
Marg'ilon akademik litseyining  
308-guruhi o'quvchisi*

POYTAXTIM KO'CHIABARI



## BAYRAM

Kattadir shahri azim, Menda o'tadi bazm. O'tar shodlikning sayli, Biror bayram tufayli. O'ylab ko'rsangiz siz ham, Yurtimda ko'pdır bayram. Senda ne sabab, o'rtoq, Bayram deb qilmang so'roq. Biror yurakda nogoh, Yonsa shodlikdan chiroq. Biz uchun shudir bayram, Quvoning birga siz ham.

## MAKTAB

Uylar bilim o'chog'i, Go'yo maktab dargohi. Mehmonlarga bizdan qarz, O'tib berish bitta dars. Vov-vov-vov, deya shu tob, Kuchukcha o'qir kitob. Mushuk ham turib tikka Ishlar matematika. Simyog' ochda qush to'la, Nima dars – bu ashula. Mehnat darsidan holi, Bo'lolmas hech chumoli, Norozi faqat tuyu Bor jismoniy tarbiya.

## PARVONA

Bizga bo'lsa ravona, Hamma senga parvona. Og'rimadimi boshing? Sovimadimi oshing? Charchamadingmi boyta? O'tgin, u yerda soya. Hatto parvona qushlar, Kuy chalib diling xushlar. Egilar daraxt shoxi, Mevamdan ye, qarog'im. Notanish-u begona, Bir-biriga parvona. Kelganlar menga bir bor, Sog'inib kelar takror.

## FAROVON

Men ham oddiy bir ko'cha, Ta'rifim so'zlay picha. Bizza hayot farovon, To'kin-sochin dasturxon. Sutlar ariqdek toshar, Qaymoq qirg'oqdan oshar. Aytayin qaysi birin, Farovonlikning sirin. So'radi bitta ko'cha, O'ylanib dedim picha. Menda yo'q tanbal, sayoq, Mehnatga zo'r ishtyoq. Baxillik topgan zavol, Odamlar o'ta halol. Sirimiz shudir xolos, Ishimiz so'zgadir mos.

*Kavsar TURDIYEVA*

Erkin MALIK



## MUXBIRLIKNING OLIS YO'LLARI

juda sekin o'qiyman. Xayolimda o'qiyversam, o'qiyversam, kitobdag'i so'zlar ichimga qamalib olib, kerak paytida o'zidan-o'zi potirlab chiqadigandek. Gapirib ber, nima deb yozibdi, so'rashadi o'rtoqlarim. Men qancha urinmay, ikki, uch og'iz so'zdan nariga o'ta olmayman. Kitobni o'qish uchun berilgan muddat esa tugab borayotgandi. Men shoshardim. Kunduz kuni ish ko'p. Kechasi vaqt bemalol-u, chiroq yo'q. Ammam kerosinni ayab, lampani o'chirib qo'yadilar. Oy to'lgan kunlar edi. Buni qarang, oydinda bemalol' kitob o'qisa bo'lar ekan. O'rtoqlarim nuqul dars tayyorlamay kelib, uyimizda chiroq yog'i yo'q, deb bahona qilishardi. Men kitobni oldim-da, oymomaga yanayam yaqinroq bo'lay,

deb tomta chiqib oldim. U paytlarda tomlar tuproq bo'lardi. Uyimiz tepalikning ustiga qurilgan bo'lib, tagidan so'qmoq yo'l o'tgan u hisobchi Turob akaning uyiga borib to'xtardi. Kitobga berilib ketibmanmi, ishqilib, ovozim balandlab ketibdi-da. «Kim u?» degan ovozdan cho'chib tushdim.

Qarasam, otda tebranib Turob aka turibdilar. Ziyofatdan qaytayotgan bo'lsalar kerak-da. Vaqt qay mahal bo'lganini ham bilmayman.

— Assalomu alaykum, Turob aka,— deb o'rnimdan turib ketdim.

Shu payt ot hurkib obqochdi-ya. Orqadan Turob akaning qopdek chayqalib borayotganini ko'rib qoldim.



Ertasiga ularning uyida yashaydigan yetimcha bola Quvondiq gap topib keldi: Turob akaning beli lat yeb, yotib qolibdi. Jamol otin kelib, uni o'qiyotgan mish.

**(Davomi bor)**



2009 Tong yulduzi  
17-avgust

## Andreyevning yagona goli «Paxtakor» jamoasini O'zbekiston kubogi sohibiga aylantirdi




Aktam Berdiyev 1991-yil 8-oktabr sanasida Qashqadaryo viloyatida tug'ilgan. Vohada Berdiyev familyali mohir futbolchilar ko'plab topiladi. Bir necha yil «Nasaf» jamoasida to'p tepib, ishqibozlar mehriga tushgan Ro'ziqul Berdiyev, bugungi kunda Farg'onaning «Neftchi» klubida bir-biridan ajoyib to'plar kiritayotgan Anvar Berdiyev... Hozirda yana bir Berdiyev futbolchi bo'lib tanilmoqda.

## G'UZORLIK DARVOZABON

Istiqlolga tengdosh yoshlar, istiqboli porloq yoshlar!

Olasida sportga qiziqish yuqoriligidan kichkina Aktamning ham futbolga mehri tushdi. Otasi Jo'ra aka va onasi Robiyaxon opa «Paxtakor» jamoasi o'ynaydigan kunni orziqb kutishar, paxtakorchilar g'olib bo'lган kun esa bu uyda haqiqiy bayram bo'lardi. Qolaversa, Jo'ra aka Qarshi Davlat pedagogika universitetining jismoniy tarbiya fakultetida o'qituvchilik qilardi. Shu boisdan ham farzandlari Akbar va Aktam to'p tepib, kurash tushib ulg'ayishdi. Aktam bolaligidanoq O'zbekiston milliy terma jamoasi darvozaboni Ignatiy Nesterovga o'xshashni juda-juda istardi.

U Toshkentdagagi futbol bo'yicha Respublika oliy sport mahorati makkabida tajribasini oshirdi. «Darvozabon - yarim jamoa», deyishgani beziz emas. Agar posbon o'z o'rnda mustahkam tursa, jamoaning qolgan a'zolari ham ishonchli o'yin ko'rsatadi. Shuning uchun ham Aktam mashg'ulotdan keyin ham qolib, to'p bilan ishlardi. Hatto ta'til berilganda ham dam olmay, vaqtini stadionda o'tkazardi. Uning intilishlarini ko'rgan murabbiylar O'zbekiston championati oliy ligasida to'p suruvchi G'uzorning «Sho'rtan» jamoasiga taklif qilishi. 16 yoshida professional klub safiga qo'shilgan



futbol klubiga taklif qilishi. Aktam Berdiyev O'zbekiston championati birinchi ligasida to'p surayotgan «Nasaf - 2» jamoasining asosiy darvozaboni aylandi.

— Albatta, asosiy tarkibda o'ynash kishidagi mas'uliyat hissini oshiradi, — deydi Aktam biz bilan suhbatda. — O'yin davomida kamchiliklarim ustida ishlab, ularni bartaraf etishga harakat qilyapman. «Nasaf - 2» «Nasaf»ga munosib o'yinchilar tayyorlab berish uchun tuzilgan jamoadir. Shu bois, «Nasaf» bosh murabbiyi Viktor Kumikov o'yinlarimizni kelib kuzatadi, mashg'ulotlar payti ko'rsatmalar beradi.

Maqsadim, «Nasaf»da o'ynash va qashqadaryolik muxlislarni xursand qilish. Yaqinda «Nasaf - 2» jamoasiga yangi bosh murabbiy keldi. U kishi jamoa mashg'ulotlariga tubdan o'zgartirishlar kiritmoqda. Jamoa o'yini hujumkorlik asosida tashkil etilmoqda.

Demak, ikkinchi davrada «Nasaf - 2» o'yinida o'zgarishlar bo'lishi aniq.

— Niyatlarim ko'p. Darvozani ishonchli himoya qilib, O'zbekiston yoshlar va milliy terma jamoalari tarkibida o'ynash orzum ham yo'q emas, — jilmaygancha qo'shib qo'ydi umidli darvozabon.

Markaziy «Paxtakor» stadionida mamlakatimizning eng kuchli jamoalari — «Paxtakor» va «Bunyodkor» final bellashuvi uchun maydonga chiqishdi. O'yindan avval ko'plab muxlislar «Bunyodkor» g'olib bo'ladi, deya taxmin qilishgandi.




## PAXTAKOR – YIL G'OLIBI



Ammo bu bashorat o'zini oqlamadi. «Bunyodkor»ning iste'dodli himoyachisi Xayrullo Karimov Aleksandr Geynrixga nisbatan xavfli o'yin ko'rsatib, hakam Marat Ismoilov tomonidan qizil kartochka bilan «taqdirlandi». Uning bu harakati «Bunyodkor»chilarga qimmatga tushdi. Yana chililik legioner Xosse Luis Vilanuyela ham maydonni tark etdi. Himoyani kuchaytirish maqsadida braziliyalik bosh murabbiy Rustam Melisiddinovni maydonga tushirdi. Baribir o'yinda «Bunyodkor»chilardan omad yuz o'girdi. «Paxtakor»ning iqtidorli himoyachisi Murod Xolmuhammedovning «aut»dan uzatgan to'piga yarim himoyachi Stanislav Andreyev darhol gol bilan javob qaytardi, Andreyevning yagona goli «Paxtakor» jamoasini O'zbekiston kubogi sohibiga aylantirdi.

Viktor Jalilovning shogirdlarini biz ham o'n karra kubok sohibi bo'lganligi bilan tabriklaymiz!

Bu ajoyib g'alaba 1979-yilda aviahalokatda nobud bo'lgan ustoz «Paxtakor»chilar xotirasiga munosib sovg'a bo'ldi.



## 80 MILLIONGA SOTILMADI

Fransiyalik yarim himoyachi Frank Riberiga Madridning «Real»idan taklif tushdi. Ammo «Bavariya» rahbarlari bu taklifni eshitishni ham xohlasmadilar. Chunki mazkur klub bilan 2011-yilgacha shartnomalar imzolangan-da. Riberi «Bavariya» tarkibida 53 bor maydonga tushgan va 20 marta gol muallifiga aylangan.

Ayni kunda 26 yoshli iste'dodli futbolchiga «Real»dan tashqari dunyoning bir qator grand jamoalari — «Barcelona», «Manchester United» va «Chelsi» ham xaridor bo'lib turibdi.



## VOLG'ONNI EPLOLMADI...

Sardor futbolchi bola. Doimo uni mashg'ulotlariga birga olib boradigan onasining yumushlari birdan ko'payib, mashg'ulotlarga qatnash kichik futbolchining o'ziga qoldi. Sardorbek mashg'ulotlardan so'ng uyiga kech qaytadigan odat chiqardi. Bundan xavotirlangan onasi:

— Nega o'z vaqtida uyg'a kelmayapsan? — deb so'radi.

Sardor turli bahonalar to'qishni bir-ikki kun epladi. Ammo uchinchi kun onasi uni gapidan ilintirdi:

— Ishxonamizdagagi Muzaffar bugun o'g'llarini G'afur G'ulom bog'idagi ko'lga cho'miltirgani olib borgan ekan, seni ko'ribdi. To'rtta o'rtoq'i bilan Sardor ham cho'milayotgan ekan, — dedi.

— To'rtta emas, olti kishi edik, Ulug'bek va Shohruh ham bor edi, — deb yubordi Sardor beixtiyor soddalik bilan...

*Sahifamizning keyingi sonida:*

*Bangkokda o'tgan I-Osiyo o'yini qatnashchilari – oltin medal sohibasi Muqaddas KUBEYEVA va bronza medal sohibi Jaloliddin SALIMJONOV haqidagi maqola bilan tanishasiz.*



2009 Tong yulduzi  
17-avgust

# BO'SH O'TIRMAY, BO'SH QOTIR!

## BILAG'ONLAR TANLOVI


Bilimdon-u zukko o'g'il-qizlar, yodingizda bo'lsa, gazetamizning shu yilgi 21-sonida Namangan tumanidagi 37-maktabning oliv toifali tasviriy san'at fani o'qituvchisi Valijon Abdullayevning «Bilag' onlar tanlovi»ni o'tkazish haqidagi taklifini e'lon qilgandik. Mustaqillik bayrami arafasida yakunlanishi rejalashtirilgan tanlov shartiga ko'ra, ustoz yo'llagan boshqotirmalarni yechib, javoblariningizni 37-maktab manziliga yo'llashingiz lozim edi. Kuni kecha Valijon akadan yana maktub oldik. Ta'til kunlari bo'lgani uchun

o'quvchilardan kelgan maktublar sonining ozligi tusayli tanlovn 1-Oktabr - O'qituvchi va murabbiylar kunida yakunlashni taklif qilib, yana ikkita boshqotirma yo'llabdilar.

Javoblariningizni quyidagi manzilga yo'llang: Namangan viloyati, Namangan tumanidagi 37-maktab, «Tasvirli bilimdonlik» to'garagi rahbari Valijon ABDULLAYEVga.

Eslatib o'tamiz:

- 1-o'ringa - radioplayer;
- 2-o'ringa - badiiy adabiyotlar;
- 3-o'ringa - fotoalbum va ikkita rag batlantiruvchi mukofot.




O'TGAN SONDA E'LON  
QILINGAN «TOSHKENT YILNOMASI» AYLANMA  
KROSSVORDINING JAVOBLARI  
Shaklda belgilangan xonadan soat mili yo'malishida: 1.-2005. 2.-2007. 3.-2003. 4.-1936.  
5.-1989. 6.-1784. 7.-1867. 8.-1868. 9.-1870. 10.-1871.  
11.-1876. 12.-1879. 13.-1881. 14.-1958. 15.-1945.  
16.-1953. 17.-1977. 18.-1997. 19.-1931. 20.-1991.  
21.-1992. 22.-1993. 23.-1994. 24.-2004. 25.-2000.  
26.-2001.

### MUAMMONOMA

Kalit so'zar: 1.Shosh. 2.Vatan. 3.Ko'hiy.

4.Hamsa. 5.Tennis.

Raqamlarda: Toshkent - ko'hna va zamonaviy ona maskanim.



### «SAKKIZ YULDUZ» BOSHQOTIRMASI

Sakkiz yulduzni yo'g'on chiziqlar sakkiz bo'lakka ajratib turibdi. Har qaysi bo'lakka keltirilgan so'zlarni shunday yozingki, natijada ular ikki martadan o'qilsin. Masalan: 1-raqamda: NAVO, OROM, BINO, IKAR so'zlarini quyidagicha joylashtirasiz.

- BINO
- IKAR
- NAVO
- OROM
- 2-raqamli bo'lakka: KOFE, IFOR, EKIN, NERU.
- 3-raqamli bo'lakka: ARAZ, TAQA, AZON, QAZO.
- 4-raqamli bo'lakka: OLIM, ILON, LO'LI, MINA.
- 5-raqamli bo'lakka: OVAL, QOQI, QARI, ILIQ.
- 6-raqamli bo'lakka: OSON, ANIQ, ROZI, QORA.
- 7-raqamli bo'lakka: VAZA, GO'JA, VAZA, OJIZ.

8-raqamli bo'lakka: JO'JA, IROQ, AJIN, NAQSH.


Izoh: Agar bo'laklarga so'zlar o'mini to'g'ri topib yozgan bo'lsangiz, sakkizta bo'lakdag so'zlarning oxirgi harflarini 1dan 8 gacha ketma-ket qo'shsangiz, «Naqsh bilan bezatilgan» so'zining mumtoz shakli hosil bo'ladi.

### NAQSHINKOR JUMBOQ

Ushbu jumboqning ayrim javob so'zlar to'laligicha, ayrimlari chala keltirilgan. Nuqtalar o'rniaga kerakli harf yoki so'zлarni yozib, boshqotirmani hal eting.

Savollar:

1. Kal... 2. To'ra... 3. Nur... 4. Ad... 5. Muz... 6. Qir... 7. Liliput. 8. Tosh... 9. Amal... 10. Raddiya. 11. As... 12. Radio... 13. Ol... 14. Nun. 15. Noib... 16. ...i. 17. Ilk. 18. Sur... 19. Nur... 20. Alik. 21...ot. 22. Tizza. 23. Alam. 24... 25. Tok. 26. Ko'z... 27...on. 28. Nor... 29. Nutq. 30. Qirq. 31...baha. 32. Oq... 33. Lag'mon. 34... 35...ol. 36. Las.



Tuzuvchi  
va naqqosh-  
lar:

Valijon

ABDULLAYEV,

Rahimjon

POLVONOVA,

Islombek ERGASHBOYEV,

Namangan tumanidagi 37-maktab

o'qituvchilar

### LAFONTEN

### MASALLARI

#### SHUKI VA UZUMLAR

  
Yozning issiq kunlaridan birida mevazor oralab yurgan tulkining ko'zi ishkomda osilib turgan bir bosh uzumga tushibdi:  
- Zap chanqog'imni qondiradigan meva ekan-da, - deya og'zining suvi oqibdi.

Keyin o'sha bir bosh uzumga sakrabdi, yetolmabdi. Yana sakrabdi, yana qo'li yetmabdi... Yana va yana bir necha bor sakrabdi-yu, uzumni uzishga imkon bo'lmbadi. Unga yetishish amri maholligini ko'rgach, o'ziga-o'zi:


- Aminmanki, uzum aslo shirin emas... Nordon ekanligi aniq, - deya ming'ir-ming'ir qilib u yerdan uzoqlashibdi.

#### IT VA AKSI

Bir kuni it go'sht parchasini mahkam tishlab uyiga ketayotgan edi. Yo'lda kichkina bir ko'lga duch keldi. Ko'lning ko'prigidan o'tayotgan payt sokin suv yuzasida og'zida lahm go'sht tishlab olgan itga ko'zi tushdi. Shoshganidan o'zini yo'qotib qo'ydi. Suvga engashib, haligi itning og'zidagi go'shtni olish uchun shaylangan edi hamki, birdan shalop etib og'zidagi go'shti suvga tushib ketdi.

Qissadan hissa shuki, «Qo'lingda boriga qanoat qilmay xom-xayolga berilsang, hamma narsadan ajrab qolasan».

Turkchadan Toshkent shahar, Uchtepa tumanidagi 238-maktab o'quvchilari  
Sumayro va Muna XOLMURODOVAlar tarjimasi



#### Muassislar:

O'zbekiston Matbuot va axborot agentligi,

O'zbekiston Respublikasi Xalq ta'limi vazirligi,

«KAMOLOT» yoshlar ijtimoiy harakati Markaziy Kengashi,

«SOG'LOM AVLOD UCHUN» hukumatga

qarashli bo'lagan Xalqaro xayriya jamg'armasi.

BOSH MUHARRIR:  
To'lqin HAYITOV

Dizaynerlar:  
Fazliddin  
SHOYODGOROV  
Olovuddin  
ARIPOV,  
Navbatchilar:  
Gulyuz ORIFJONOVA,  
Yusuf ABDULLAYEV

Gazeta  
O'zbekiston  
Matbuot va  
axborot  
agentligida  
0208-raqam  
bilan 2007-yil  
2-fevralda  
ro'yxatdan  
o'tgan.

TAHIR HAY'ATI:  
G'ayrat SHOUMAROV,  
Svetlana INOMOVA,  
Qahramon QURANBOYEV,  
Odina JAMOLDINOVA,  
Jabbor RAZZOQOV,  
Feruza JALILOVA  
(Bosh muharrir o'rbinbosari),  
Dilmurod RAHMATILLAYEV,  
Dilshoda DADAJONOVA

Manzilimiz:  
Toshkent shahri,  
Navoiy ko'chasi, 30-uy.  
Indeks: 700129.  
Obuna indeksi: 198.  
e-mail: tong1924@mail.ru  
Tel: 244-27-25, 244-63-08  
Tel/faks:  
(99871) 244-38-10

«O'zbekiston»  
nashriyot-matbaa ijodiy  
uyida chop etildi.  
Haftaning  
dushanba kuni chiqadi.  
Shakli A-3,  
2 bosma taboq.  
ISSN 2010-6092  
Adadi - 26555  
Buyurtma N: J 7927